

Skina di Ruthy

Sabiduria den nos alegria!

Skirbi pa Ruthy "Lady Ruth" Vrieswijk-Bergen

Berdad bida sa ta cortico. Aunke nos tur cu haya e "dia" como regalo dia pa dia, nos no ta realiza tur ora con precioso un dia cu su 24 oranan largo por ta. Tin di nos ta biba mas conciente cu otro, cu mas amor, cu mas fe. Tin di nos tambe cu sa biba como si fuera nos lo ta aki pa 200 aña y no ta worry cu nos prohimo. Pero e ley di naturaleza ta dicta otro. Nos curpa ta bira bieu y marchita, e ta gasta. Tin ta bira malo, sufri, haya tratamiento, bira bon of ta muri bay den e bida mas aya. Nos ningun kier muri ni jong ni bieu, pero nos tur tin cu bay mas aya un biaha.

Y....nos ta muri bay laga sernan keru atras cu ainda no a caba cu nan mission aki bao. Mas y mas mi ta gusta e relacionan di Pastor Balootje den corant. E tin asina hopi razon den hopi cos cu ta concerni nos manera y moda di biba. Bo biba bon, come salud y balia y hari un crenchi, esaki tambe por alarga bo bida carnal un crenchi. Pero... nos bida nos tin'e fia . Pa un tempo. Tin pa poco tempo y tin pa hopi tempo o. Nos ningun ta para den rij pa bay cerca Papa Dios, pero Papa Dios tin su buki di bida skirbi den su plant'i man. E ta duna, E ta tuma. Y awor el a tuma un dushi hendé, nos bon amigo colega den radio difusion fei tempo di Radio Kelkboom den añanan setenta. Ruthy Bergen a caba di slaag pa su diploma di Mavo-4 y a contesta e aviso cu Radio Kelkboom tabata buscando un Operadora. Nos a haya e trabao. Y asina nos a drenta Farandula como MC hunto cu e gentil y guapo caballero, Ruben Garcia, kende tabata traha na e emisora ey prome cu mi.



Ruthy aki cu Ruben Garcia na Radio Kelkboom.

Ta Ruben Scorpio Garcia a introduci mi como MC cu mi 16 aña di edad den Wilhelmina Stadion cu eleccion di reina hubenil di Carnaval. Con e talentoso Ruben tabata graba su programa pa hubentud cu smak, amor y passion y alegria! Y ta e ingredien-tenan ey a bira su yabanan pa exito grandi y total. El a traha di su hobbie su trabao. Y a bira tops, "the best of the best". Mi a bisa algun tempo atras caba, locual tur rond di nos ta confirma awe. Ruben Garcia ta esun mas grandi den su epoca riba tereno di Radiodifusion y despues tambe cu programanan presenta na television pa añas. Pa nos, e mas grandinan den nan epoca ta Gregorio "Ito" Tromp , Ruben "Scorpio" Garcia y Ruben Traxx Trapenberg dfm. Ta cabayeronan cu disciplina den tur locual nan ta hasi na bienestar di pueblo oyente of televidente. Esun cu ta lantando cabes hopi tambe ultimamente ta e hoben maestro di scol Adonsito Croes como un bon MC. Ta nos tesoronan. Y awor, un di e joyanan di mas balioso cu a drenta hogarnan cu su vos unico, caluroso, cu positivismo y alegria mester a bay nos dilanti.

Danki na tur cu a aprecia y stima nan na bida y cu ta aprecia esnan cu ainda tey. Ruthy "Lady Ruth" Vrieswijk-Bergen y Bea "Liesje" Croes Quilotte tambe tin bunita recuerdonan di Scorpio Ruben Garcia den nos epoca di hubentud sano y bon balansa. Nos tabata teenagerman felis y contento cu respet pa nos

mes y pa otro. Ruben cu su Scorpio's Disco cu asistente Roy Inocencia awe ambos den feliz memoria. Ruben a bini un biaha cu su mesun grupo di Scorpion den parada di Carnaval, entre otro. Tur su proyectonan, tur su actividadnan, tur su trabaoonan el a eherce cu passion y amor. Y aunke despues bida di adultonan a tuma su rumbo, casa y forma famia, ora di topa ta manera tempo a para keto un rato den tempo. Tempo di calidad, no cantidad. Pero awor? Ta keda un bashi. Un dolor. Un tristeza.

Lo recorda Ruben Garcia, cu awor tambe ta mas cerca di mente, alma y curazon. Lo tuma tempo pa su bunita señora esposa lieve Treesje, yiunan y nietonan adapta na e cambio aki den nan bida, awor sin esposo, tata y welo. Ta hopi ta e sentimentonan den e comentarionan skirbi riba Facebook, den corant y ariba social media digital. Ta tur sa cu un di e "Giantnan" a cumpli cu su mission den bida akibao y cu e lo sigui riba su viahe spiritual cu mas luz y amor di su Creador. Asina mes cu e tristeza, ban habri nos curason pa e amor y lus di Pascu cu ta na skina cla pa drenta, cu gradicimento pa e fantastico y interesante bida di Ruben Scorpio Garcia, cu a crese den nos dushi barío di Dakota tur dia.

Ruben, habri hala y bula halto awor den eterno luz y amor di Creador y Arkitecto di Universo. Y mientras nos ta aki ainda, laga nos scoge pa e paz, bondad, amor y sabiduria pa duna nos energia y forza pa sigui padilanti cada dia, "One day at a time". Condolencia, consuelo y amor pa famianan Garcia-Marchena, demas famia, coleganan, amigonan y Aruba henter. "Stay safe, love you too"!

